

經略復國要編

經畧復國要編卷之十

與李提督書

八月初一日

節報倭奴盡數上船送還王子陪臣在道深為大將軍慶忭隨得胡澤沈思賢稟帖又云向見沈惟敬問金山情形云長二百里濶四十里可屯百餘萬人馬今已成市且可接濟對馬島今有小將在此倭衆不肯遽然盡退其報又如此不佞私惟吾儕慮事寧慎毋忽倭即渡海尤當作速調停留守一事縱有他意不致長驅倘猶遷延必有後悔幸大將軍力圖之

又 初三日

議留我兵一萬二千甚善第鄙意謂狡倭變詐無常
我兵防守非二萬不可大將軍將保定五千山西二
千楊元召募家丁一千湊足其數庶分布多人本國
可永保無虞大將軍之功不獨在今恢復也世世戴
之美小牌奉覽不備

移朝鮮國王咨

初四日

一為暫留大兵防守以固外藩以安內地事先該本
部以議處留兵糧餉移咨去後未准咨復今據將領
報稱釜山倭奴將王子陪臣并家眷送還盡行上船
遠遁即行長亦往西生浦去等情據此為照島夷已

遁我武維揚貴國江山盡行恢復本部當為王稱慶
矣惟是倭性難馴狡謀叵測必留守周密斯善後有
終本部為王國熟思審處前議兵一萬餘尚恐未足
另行李提督再為酌議大約以二萬為率分為二枝
以一枝分布大丘善山之間守慶尚以一枝分布南
原晉州之間守全羅聲勢相聯左右相倚似或可以
無慮顧猶有說焉留守之兵去家萬里遠戍異鄉彼
其心豈無父母妻子之繫非厚利結心何以責其效
力今議每軍一名月給糧銀一兩五錢行糧鹽菜銀
一兩五錢衣鞋三錢犒賞三錢共銀三兩六錢其將

領廩糧亦從優厚以一歲計之大約該銀一百萬兩
日支本色糧料在外王當速與司餉之臣計處前項
銀兩如以軍興之後或糧有餘而銀不足則貴國礦
山頗多乃天地自然之利取助國費又何患也然留
守軍兵非惟有定數抑且有定時倭寇往來非惟無
定時抑且無定數以有定待無定甚非久計今王國
方六千里地非不闊八道三都民非不聚沃野膏壤
粒米非不狼戾也語曰琴瑟之不調甚則改而更張
之今王當再造維新之際亟行全羅慶尚京畿等道
令陪臣募選膂力精壯軍人以多為善即使陪臣管

轄盡發副將劉綎吳惟忠駱尚志等營本部另行各
將知會如選兵到日令其所服衣甲與南兵同所執
器械與南兵同令各營教師訓練起伏擊刺之法與
南兵同不數月間自與南兵無二倭來則助我兵以
與戰守由此漸漸加增漸漸熟練多造軍器廣積芻
糧仍照本部前咨設險守國事理於今防守慶尚全
羅要害處所凡係險隘阨塞本部移檄劉副將會同
各將官與貴國臣民即便相度地形竭力修舉應斬
塹者斬塹應挑壕者挑壕應築關者築關應置柵者
置柵海口應設烽堠者舉建烽堠海船應出洋哨探

者不時哨探修廢舉墜革故鼎新如此而國不富兵
不强讐不復者未之有也又何怯於居守哉本部為
王熟思審處已定數日內立望舉行萬勿延緩遲滯
為此移咨煩請查照區畫施行

與艾主政書

初四日

昨據李提督報雖云倭奴退還西生浦而其謀叵測
未可深信糧餉一事欲加催償以為留兵之需極為
確論況今留兵又不可少擬足二萬之數獨欲借資
朝鮮又恐不給須天朝助之則山東轉運更宜急急
也餘兵撤還似亦不遠不佞旋期尚欲與提督君一

晤未敢以定期遽覆也使旋附此代申不盡

報三相公并石司馬書

初五日

東事仰仗洪謨近據提督報稱清正諸倭悉盡下海
平行長止為貢事帶領部下兵馬亦回至西生浦矣
浦在海南去金山四十餘里不佞愚見講貢一事始
而平壤繼而王京皆借此一着用以退倭翁臺尊意
亦復如是故不佞原無奏疏前次王京塘報亦只虛
虛談及不敢實說報在可查也祇為倭情狡譎神鬼
難測即如近日沈惟敬久在倭營絕不通信欲攻全
羅乃發回惟敬講貢以緩我師此明驗矣今日之事

亦只宜借用此着了却前件若待實做委為不敢乃
畏倭之反覆難定實非因人言之曉曉也是以不佞
與贊畫提督密議將惟敬倭將拘留羈縻延緩月日
俟吾防禦諸策已定復命回京應行事宜面商請教
何如倭今浮海善後一事最為緊要毫忽不可草率
者查得全羅慶尚兩道在朝鮮極南慶尚居東南角
全羅居西南角是謂二南也倭犯朝鮮必由之路舍
此則無路矣此係全國緊要門戶而視王京平壤則
堂奧矣門戶守則堂奧安兩道要害如慶尚之大丘
慶州善山高靈諸路是也如全羅之南原雲峰光陽

求禮諸路是也近日守此諸路倭不能犯要孰甚焉
若前報烏嶺三道又在腹裡當作重關今於此處令
留守諸將協同陪臣相度形勢險夷築關隘建臺城
將我留兵同彼麗兵酌量緩急撥兵多寡分發守之
再查全羅慶尚沿海舊設左右水營左右兵營盡令
修復設朝鮮兵馬守之釜山一帶衝要海口凡可通
全慶南北二要路者俱令謹斥堠明信砲勿使失誤
再令諸將將我得力火器移取匠役赴全羅用彼鐵
炭就近打造分發各路然我兵分布兩道每道非一
萬人不可提督已選留兵一萬二千茲復行提督將

山西兵二千真保五千楊元新募家丁一千湊足二萬之數此斷斷不可少者仍咨國王將忠清羅慶三道入馬挑選精銳數萬分發協守我兵俱厚加月餉鹽菜衣鞋等項每兵每月議給三兩六錢月餉之外每日又給本色糧料足用俱令朝鮮備辦廩餼既厚兵必樂從倘朝鮮或告消乏中國量助十分之三亦不為多劉綎授以總兵職銜管轄留守諸將而受成於薊遼總督稽察防範則付遼東撫院如此備禦亦為嚴密倭雖狂逞恐無能為且將朝鮮精銳兵馬分布我兵各營隨營操練俟其習熟又復有險可恃我

兵漸次撤回庶在朝鮮可保無事而我國亦大有益焉兩利之道也鄙見如斯不識高明以為何如

檄李提督

初五日

一為倭情事本月初四日據朝鮮體察使柳成龍報
擄逃回人供稱倭賊在梁山機張者請兵於釜山浦
留住倭將欲犯慶州又報倭船或大或小或三四隻
八九隻連日從東大洋出沒賊謀難測恐有乘虛冲
突之患且慶州於東邊郡邑為鉅頗有儲峙事甚可
憂等情到部據此看得倭奴前遣小西飛來求款貢
則一面攻犯晉州今次送還王子陪臣二使退駐西

生浦方謂其恭順復又報稱欲犯慶州及查西生浦尚在金山之南猶是朝鮮境界未曾浮海遠去似此狡謀變詐陽為遜遁陰肆攻搶在沈惟敬久駐倭中必明知其故乃今尚藏頭隱尾不發倭奸倘一朝倭醜盡行恐本官亦難辭罪也雖前報未可遽憑然兵事寧過於慎合行查明申飭牌仰平倭提督即差的當人員哨探倭奴是否於東洋乘船出沒有無攻犯慶州情形如無照舊防守如真作速補撥八千名務足二萬之數庶幾分布仍檄示劉綎相度事機發兵前往慶州一帶救援協同朝鮮官兵防禦查明具由

回報毋得遲悞

報三相公石司馬兵科書

初五日

兵貴擇將自古已然留守一節最為喫緊劉綎勇而
且智必斯人總轄方保萬全倘以他將易之或致疎
虞某與李提督雖云卸肩亦不能無遺責矣此事非
有私於綎也祇為社稷爾萬祈相公主張俯從愚請
至禱至禱

報石司馬書

初六日

某請留兵二萬恐臺下或慮朝鮮糧餉不敷欲裁其
數此則不可蓋朝鮮沃饒中國罕見周圍五六十里

俱是稻田雖山土亦深數尺可種五穀無雨隨處有
泉而不旱多雨有海可洩而不滯若全羅慶尚忠清
江源四道即江南未易匹休儲積甚富足供軍需雖
慶尚近被倭患亦自有數不足為全羅之累前者乏
糧浮談乃諸將借此欲圖撤兵不足信者幸臺下一
力主持務足此數不費中國財餉可固中國藩籬何
憚不為端此代懇

檄李提督

初六日

一為禁約事據平倭提督稟稱訪得回兵將官內有
故違仍用朝鮮馬牛馱載器物數多俱潛伏臨江處

所以待行後方纔渡江乞於旋兵之日差官江沿逐一查點各營兵丁除病故陣亡各自有數實在不到者即係私遣馱器西回一併追治等因到部據此為照大兵東救朝鮮本為恤災捍患故本部於入境之初嚴行不許秋毫無犯既勝之後嚴行不許妄取該國銅器無非欲重天朝體統啓屬國觀瞻三令五申已非一日差官緝拏又非一次乃貪鄙之輩尚復故違如此今當凱旋尤宜嚴禁所據提督稟稱深得禁約良法擬合舉行牌仰平倭提督即選標下廉謹的當官五員前來聽本部再差官員前往義州江口把

截如遇撤回兵丁許令照數查點若有不到即係私
馱銅器或明白馱器過江者即便拏獲俱稟報本部
以憑究治除本部嚴給告示外提督仍一面出示一
面申飭三協將領功成之日正宜約束保守毋因小
失大以隳名節其標下官亦一體禁約并差官亦不
得假此生事訪出併究文到即令差官前來毋得遲
誤

與李提督書

初七日

賊已歸巢不佞與大將軍幸可卸肩但倭謀叵測防
守當預鄙意必欲留兵二萬者為萬全計也幸即發